

**Faruk Selmanović**

Zastupnik u Skupštini Kantona Sarajevo

Bosna i Hercegovina

Federacija Bosne i Hercegovine

Kanton Sarajevo

**Skupština Kantona Sarajevo**

n/r Kolegija Skupštine Kantona Sarajevo

**Uputiti:** Ured za borbu protiv korupcije i upravljanje kvalitetom Kantona Sarajevo, Kantonalna uprava za inspeksijske poslove Kantona Sarajevo, Kantonalna uprava civilne zaštite Kantona Sarajevo i Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo

## **INICIJATIVA**

Na osnovu člana 213. Poslovnika Skupštine Kantona Sarajevo, upućujem inicijativu prema Uredu za borbu protiv korupcije i upravljanje kvalitetom Kantona Sarajevo, Kantonalnoj upravi za inspeksijske poslove Kantona Sarajevo, Kantonalnoj upravi civilne zaštite Kantona Sarajevo i Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo radi hitnog ispitivanja okolnosti koje se odnose na realizaciju sanacije klizišta Curine njive na području Općine Stari Grad Sarajevo.

## **Obrazloženje**

Nakon zaprimljenih informacija od građana sa terena, kao i obilaska predmetnog lokaliteta, utvrđeno je da se radovi na sanaciji klizišta Curine njive trenutno izvode isključivo na području Grada Istočno Sarajevo, odnosno na teritoriji entiteta Republika Srpska, dok na dijelu lokaliteta koji se nalazi na teritoriji Kantona Sarajevo nisu uočeni izvođači radova niti aktivnosti koje bi ukazivale na provođenje mjera sanacije.

Posebno zabrinjava činjenica da se radi o jednom od najozbiljnijih klizišta na području Sarajeva, koje predstavlja direktnu prijetnju stanovništvu, infrastrukturi i imovini, te zahtijeva koordinisano i blagovremeno djelovanje svih nadležnih institucija.

Vrijeme ubrzano prolazi, a period intenzivnijih padavina i zimskih uslova sve je bliži. Svako dalje odgađanje radova može imati ozbiljne posljedice po sigurnost građana i stabilnost terena.

Prema informacijama kojima raspolažemo, kao i procjenama stručnih lica koja prate stanje na ovom lokalitetu, radovi koji se trenutno izvode predstavljaju samo jedan segment ukupne sanacije. Da bi projekat ostvario puni efekat i trajno doprinio stabilizaciji terena, neophodno je istovremeno realizovati i mjere koje su planirane na području Kantona Sarajevo.

Stoga se opravdano postavlja pitanje zbog čega na terenu nema izvođača radova sa strane Kantona Sarajevo, koje aktivnosti su do sada poduzete, te da li postoje administrativne, finansijske ili druge prepreke koje usporavaju realizaciju projekta.

Dodatnu zabrinutost izazivaju nezvanične informacije prema kojima sistem senzora za praćenje pomjeranja tla i stanja klizišta možda nije u punoj funkciji, odnosno da se podaci ne očitavaju ili ne obrađuju redovno zbog navodno neizmirenih finansijskih obaveza Kantona Sarajevo prema Građevinskom fakultetu Univerziteta u Sarajevu.

Imajući u vidu značaj ovog projekta za sigurnost građana, neophodno je hitno utvrditi stvarno stanje i odgovornost svih uključenih subjekata.

**Stoga tražim da nadležne institucije dostave sljedeće informacije:**

1. Da li se trenutno izvode radovi na sanaciji klizišta Curine njive na teritoriji Kantona Sarajevo, te ukoliko se ne izvode, iz kojih razloga.
2. Koje je aktivnosti Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo poduzelo u posljednjih 12 mjeseci na realizaciji projekta sanacije klizišta Curine njive.
3. Da li su obezbijedena finansijska sredstva za izvođenje radova na području Kantona Sarajevo i u kojem iznosu.
4. Da li su provedeni postupci javnih nabavki, izbor izvođača radova i stručnog nadzora, te ukoliko nisu, u kojoj fazi se nalaze navedeni postupci.
5. Ko je odgovoran za koordinaciju aktivnosti između institucija Kantona Sarajevo i institucija Grada Istočno Sarajevo u vezi sa sanacijom predmetnog klizišta.
6. Da li postoji usvojeni plan aktivnosti sa preciznim rokovima za izvođenje radova na teritoriji Kantona Sarajevo.
7. Da li su funkcionalni svi senzori i sistemi za praćenje stanja klizišta postavljeni na lokalitetu Curine njive.
8. Da li se podaci sa senzora redovno očitavaju, analiziraju i dostavljaju nadležnim institucijama.
9. Ko je nadležan za održavanje i upravljanje sistemom monitoringa klizišta.
10. Da li su tačni navodi da se podaci sa senzora ne očitavaju zbog neizmirenih finansijskih obaveza Kantona Sarajevo prema Građevinskom fakultetu Univerziteta u Sarajevu.
11. Ukoliko postoje neizmirene obaveze, tražimo da se dostavi njihov iznos, period na koji se odnose i razlozi zbog kojih nisu izmirene.
12. Da li su Ured za borbu protiv korupcije i Kantonalna uprava za inspeksijske poslove vršili nadzor nad realizacijom projekta sanacije klizišta Curine njive, te ukoliko jesu, da dostave nalaze, preporuke i eventualno utvrđene nepravilnosti.
13. Da li postoji procjena rizika za stanovništvo i objekte koji se nalaze u zoni potencijalnog uticaja klizišta, te koje su preventivne mjere poduzete od strane Kantonalne uprave civilne zaštite.

**Zaključak**

S obzirom da se radi o lokalitetu koji predstavlja ozbiljnu sigurnosnu prijetnju po građane, imovinu i infrastrukturu, smatram da je neophodno hitno utvrditi zbog čega radovi izostaju na teritoriji Kantona Sarajevo, dok se istovremeno izvode na teritoriji susjedne lokalne zajednice.

Građani imaju pravo znati šta je do sada urađeno, gdje su utrošena sredstva, ko je odgovoran za eventualna kašnjenja i da li sistem monitoringa klizišta funkcioniše na način koji garantuje pravovremeno upozoravanje i zaštitu stanovništva.

Zbog ozbiljnosti situacije tražim da se predmetna inicijativa razmatra po hitnom postupku te da se tražene informacije dostave Skupštini Kantona Sarajevo u najkraćem mogućem roku.

S poštovanjem,

**Faruk Selmanović**

Zastupnik u Skupštini Kantona Sarajevo